

痛史

第十七種

隆武遺事



中華民國元年六月初版



翻印
必究

(痛史國變難臣鈔一冊) 附錄三種
第二十種

(每冊定價大洋壹角)

校訂者
印行者

商務印書館

印刷所

上海、北河南路北首寶山路
商務印書館


總發行所

上海四馬路中市
商務印書館

隆武遺事

乙酉五月。南都失守。總兵官鄭鴻逵、鄭彩退師回閩。會唐王從河南來。奉之至福州。與巡撫張肯堂、巡按吳春枝、原任禮部尙書黃道周、南安伯鄭芝龍等共議。唐王監國。王太祖後封南陽。初失愛於祖父。兩叔謀奪嫡。未得請名。及祖瑞王薨。守道陳奇瑜、知府王之柱爲之請。得嗣。後以統兵勤王。擅離南陽。錮高牆。會赦出。性率直。喜詩書。手草傳檄。灑灑數千言。鴻逵請正位以饜衆心。芝龍意別有在。固爭以爲不可。諸大臣皆言監國名正。俟出關尺寸。建號未遲。而李長倩亦疏言。急出關。緩正位。示監國無富天下之心。不報。擁戴臣貪定策功。不數日。卽位於福州。改元隆武。大赦。時閏六月十五日也。

是日郊天。大風拔木揚沙。駕回宮。尙寶司卿坐馬忽驚躍。玉璽墮地。損一角。人咸異。



之。改福州爲天興府。以布政司爲大內。封鄭芝龍平虜侯。鄭鴻逵定虜伯。鄭芝豹澄濟伯。鄭彩永勝伯。設六部九卿。以張肯堂爲吏部尙書。李長倩爲戶部尙書。曹學佺爲禮部尙書。吳春枝爲兵部尙書。周應祥爲刑部尙書。鄭瑄爲工部尙書。馬思禮爲通政司使。鄭廣英爲錦衣衛都督。以天興、建寧、延平、興化四府爲上游。汀州、邵武、漳州、泉州四府爲下游。各設撫按。起蔣德燝、黃道周、黃景昉、蘇觀生、何楷、陳洪謐、林欽楫、朱繼祚、黃鳴俊爲大學士。改庶吉士爲庶萃士。命蘇觀生主之。以招選賢才。又起曾櫻、何吾騶、郭維經、葉廷柱入閣辦事。閣臣至三十餘員。其遠不能至者。尙有王應熊、楊廷麟等。僅列其名。其有票旨。隆武帝手爲之。閣臣閒居而已。德璟、景昉欲楫力疏辭。行人以死請。乃至。德璟陛見。首請親屯練軍。集廷臣議戰守。兵定二十萬。自仙霞關而外。宜守者一百七十處。計十萬。其十萬。今冬精練。明春出關。一出浙東。一出江西。統二十萬之兵。合八閩兩浙兩粵之餉計之。尙不給。然竟成築舍。

時內文武濟濟。然兵餉戰守。悉委之芝龍。芝龍、泉州人。城南三十里安平鎮。其故

府在焉。芝龍從幼在海爲盜。凡海盜皆其故盟。或其門下。自就撫後。海舟非鄭氏旗號。不能往來。每舟例入三千金。歲入以千萬計。富擬於國。自築城安平。海稍直逼臥內。可逕達海。守城兵餉。皆自給。不取於官。旗幟鮮明。戈甲堅利。盜有遁入海者。檄付芝龍。取之如寄。弟芝虎勇冠三軍。昔征劉香老。歿於海。次鴻逵。次芝豹。一門聲勢。赫奕東南。芝龍開府城南。坐見九卿。入不揖。出不送。其貴倨如此。

粵西靖江王某。於八月亦稱監國。不奉詔。舉兵將東。廣西巡撫瞿式耜。移書總督丁魁楚爲備。又檄思恩參將陳邦傳防梧。靖江王遣桂平道井濟促式耜入見。式耜不往。未幾。靖江王提兵至梧。命式耜易朝服朝。式耜不從。以兵脅之。卒不奪。靖江王旋爲魁楚所敗。返桂林。時粵西總兵楊國威亦從靖江王。式耜授計於焦璉。國威旗鼓而邦傳亦應檄至。遂擒靖江王及國威。并吏科給事顧奕等。械至。斬之。封魁楚伯爵。式耜進兵部侍郎。

時浙東亦奉魯王監國。先是清兵入杭州。潞王以城降。原任巡撫祁彪佳赴水死。左

都御史劉宗周不食死。有絕命詞云。留此旬日死。少存匡濟意。決此一朝死。了我平生事。慷慨與從容。何難亦何易。又示塔秦示瞻詩云。信國不可爲。偷生豈能久。止水與疊山。只爭死先後。若云袁夏甫。時地皆非偶。得正而弊矣。庶幾全所受。門人會稽諸生王毓著聞變。卽遺書先生云。願先生早自決。毋爲王炎午所弔。卽投泖橋而死。儒士潘集奔東渡橋。袖石自沉死。周卜年赴海死。大學士高宏圖流寓紹興城外。至野寺不食死。原任山西僉事鄭之尹子遵謙。殺浙江招撫使某於江上。遂同張國維。方逢年、柯夏卿、宋之普、陳函輝、陳汝霖、孫嘉績等。迎立魯王於台。會朱大典於金華。亦遣唐珏上表勸進。王遂監國於紹興。以國維逢年之普爲大學士。國維督師江上。賜上方劍行事。其子世鳳爲將軍。封方國安荊國公。守嚴州。張鵬翼永豐伯。守衢州。鄭遵謙義興伯。王之仁武安伯。補陳潛夫原任御史。加大僕寺少卿。監各藩鎮兵馬。七月。復富陽。八月。復於潛。時兵馬雖集。各不相統。部曲騷然。國維疏請尅期會戰。則彼此迭入。我有番休之逸。而攻堅擣虛。敵無應接之暇。且必聯諸帥之心。化爲一心。

然後可使人人之功罪。化爲一人之功罪。馬士英奉宏光帝太妃至紹興。人士猶未知宏光所在。國維首疏參馬士英誤國十大罪。士英懼。不敢入朝。原任禮部□□王思任。疏請斬士英以謝天下。王疏云。戰鬪之氣。必發於忠憤之心。忠憤之心。又發於廉恥之念。事至今日。人人無恥。在在不憤矣。所以然者。南都定位以來。從不曾眞實講求報雪也。主上寬仁有餘。而剛斷不足。心惑奸相馬士英援立之功。將天下大計盡行交付。而士英公竊太阿。肆無忌憚。窺上之微而有以中之。上嗜飲則進醞醪。上悅色則獻妖淫。上喜音則貢優鮑。上好玩則奉古董。以爲君逸臣勞。而以疆場擔子。一肩推與史可法。又心忌其成功。而決不照應之。每一出朝。招集無賴。賣官鬻爵。攫盡金珠。而四方狐狗輩。願出其門下者。得一望見。費至百金。得一登簿。費至千金。以至文選職方。乘機打劫。巡撫總督。見兌卽題。其餘編頭修脚服錦橫行者。不在話下矣。所以然者。士英獨掌朝綱。手握樞柄。知利而不知害。知存而不知亡。朝廷篤信之。以至於此也。茲事急矣。政本閣臣。可以走乎。兵部尙書。可以逃乎。不戰不守。而

身擁重兵。口稱護太后之駕。則聖駕獨不當護耶。一味欺瞞。滿口謊說。英雄所以解體。豪傑所以灰心也。及今猶可呼號泣召之際。太后宜速趣上。照臨出政。斷酒絕色。臥薪嘗膽。立斬士英之頭。傳示各省。以爲誤國欺君之戒。仍下哀痛罪己之詔。以昭悔悟。則四方之人心士氣。猶可復振。而戰鼓可厲。苞桑可固也。

乙酉五月。又上揭士英云。爲一人定國。可以因敗爲功。千載留名。可以去邪從正事。閣下文采風流。才情義俠。職所素欣者。慕者。卽當國破衆疑之際。援立今上。毅然主之。以定時局。豈不中外悅服。以爲古之郭汾陽。今之于少保也。何快何幸。然而一立之後。閣下氣驕腹滿。政本自由。兵權獨握。從不講戰守之事。只知貪黷之謀。酒色逢君。門牆固黨。以致人心解體。士氣不揚。叛兵至則束手無策。強敵來而先期以走。致令乘輿播遷。社稷邱墟。高皇帝鼎鐘之華闕。鑿聚腥羶。閣下謀國至此。卽喙長三尺。亦何以自解也。憤極神人。懼兼夷夏。恐閣下展轉清夜。夢寐亦不得安。略計將來。良心亦不盡死。以職上計。莫若明水一盂。自刎以謝天下。則忠憤節義之士。尙爾相亮。

無他。閣下妻孥子孫。庶幾可留苗裔。若但求全首領。亦當立解樞權。授之才能清正大臣。以號召英雄豪傑。呼號惕厲。猶可俾望中興。所謂一人定國者也。如或逍遙湖上。潦倒煙霞。仍效賈似道之故轍。則千古笑齒已經冷絕。再不然。如伯嚭渡江。吾越乃報仇雪恥之國。非藏垢納汙之區也。職當先越胥濤。乞素車白馬以拒閣下。上干洪怒。死不贖辜。閣下以國法處之。則當束身以候緹騎。以私法處之。則當引領以待鉏耨。言粗意妄。不勝皇惡。

第二揭云。爲明主宜明。正人宜正。懇乞亟請皇上當陽。以還剝復事。某伏處林泉。羣病無識。然聞道路悲啼。化離逃竄。岌乎殆哉。朝不保夕矣。輒歎國家之事。遂至於此。詢問乘輿。俱云不知去向。堂堂天子。可以喝招乎。可以寄放乎。可以藏匿乎。閣下自許。豈不附於正臣。然皇上乃大明之主也。當曉然與衆共知。啟蹕何日。駐蹕何方。經過行在。委曲圖存。自當一大書。布告中外。而今閣下以揆首樞元。拋撇主人。擁兵自衛。託言護太后駕來。亦如虜中事。謂之攝政。豈不羞鬚眉而喪衣冠之氣乎。閣下

身爲大臣。又爲親臣。愛臣。形影相依。呼吸相屬。豈有不知今上所在者。而詭祕若此。無非慮虜之追上。而且自爲逃也。正乎不正乎。皇上何以待閣下。而閣下設心至此。天容之否。且某聞之。君猶日也。日有晦有蝕。而天上斷無二日之理。天上不可一日無日。則天下不可一日無君。今帝座虛十幾日矣。有何妙用。有何奇謀。某以爲光明正大。仍是我朝君相之事。若再欺蒙苟且。不明不白。則中□□□□□。閣下主何意矣。近聞黃靖南戰勝虜遁。閣下卽當從皇上所在。立請復至留都。如皇上駕在浙境。亦當請至會城。定位以安天下。庶爲正理。閣下仍猶不失爲正臣。嗟乎。閣下果肯盡忠如靖南之戰。皇上旣已親征。正是祈父戮力之時。而閣下星夜走避。帶此十萬兵至浙。何爲。閣下勿謂天下人盡無手眼。考終命三字不易。子孫三族所係也。閣下試低頭思之。

十月。清兵至□□。方國安嚴陣禦之。國維率王國斌趙天祥策應。追戰於草橋門。會天大風雨。礮石俱不得發。遂各斂兵。清兵營木城於沿江。閩中詔至。諸求富貴者爭

應之。監國遂下令返台。士民復皇皇。國維馳至紹興。上疏隆武帝曰。國當大變。凡爲高皇帝子孫。當同心戮力。興復大業。俟成功之後。入關者王之。監國退居藩服。禮誼昭然。若以倫敘。叔姪定分。在今日原未假易。且監國當人心奔散之日。鳩集爲勞。一日南拜正朔。鞭長不及遙制。脣亡齒寒。猝然有變。悔何可追。臣老臣也。豈若朝秦暮楚之客哉。疏入。議始定。而浙閩已成水火矣。

閩餉不足。芝龍遣給事中梁應奇入粵督餉。應奇往。參遲誤者數十人。命提問。亦莫應。潮州知府楊球遂止越界。不敢入。芝龍又命撫按以下。皆捐俸助餉。官助之外。有紳助。紳助之外。有大戶助。又借徵次年錢糧。又察括府縣庫積年存銀未解者。釐毫皆解。又大鬻官爵。部司價銀三百兩。後減至百兩。武劄僅數十兩。或數兩。於是倡優厮隸。盡列冠裳。然無俸無衙。空名而已。其黠者倩軒蓋。顧僕役。拜謁官府。鞭撻里鄰。晉江令金允治蒞訟。兩造稱職官。則立而語。互毆於庭。不可制。受害者延頸。然猶苦餉不足。所招關門兵。不過疲瘡數百人耳。時廷臣請出關者。章滿公車。隆武亦欲躬

履行間。而芝龍以缺餉爲辭。十月。會后至。乃暫止。

初。隆武帝子身南來。鴻逵以所掠美人十二獻。及后至。乃大興將作。擴構宮殿。扈匪之器。悉用黃金。開織造府。造龍袍。后服下體。皆織龍鳳形。后性警敏。頗知書。有賢能聲。每召對奏事。后於屏後。共決進止。隆武帝頗嚴憚之。而尙未有嗣。芝龍乃令子森入。賜國姓。改名成功。每伺隆武帝意所向。輒先告芝龍。由是廷臣無敢異同者。宰相半出其門下。何楷與芝龍爭朝班。不合。乞歸。中途被盜截其耳。詔求賊。不得。給事中劉中藻亦以忤鄭氏去。或密以鄭氏攬權告隆武帝。帝切責芝龍。芝龍怒。佯謝事。帝隨固留曰。此非朕意。乃某人言也。芝龍潛中傷之。於是左右無一同心者矣。

南來無賴之徒。爭上疏談兵。卽得召對。片言合旨。賚寶錠。賜官爵。久之漸多。部曹幾及千人。所賞。芝龍亦不應。隆武心知芝龍不可恃。卒無以制之。芝龍亦以不出關。無以壓衆心。乃分兵爲二。聲言萬人。實不滿千人。以鄭鴻逵爲大元帥。出浙東。鄭彩爲副元帥。出江西。隆武做淮陰故事。築壇於郊。拜而送之。旣出關。疏稱候餉。駐不行。月

餘。內催二將檄如雨。而切責鄭彩畏縮不前。自有國法在。不得已踰關行四五百里而還。仍疏言餉絕。留如故。

於是黃道周以師相請募兵江西。江西多其子弟。願俱效死軍前。芝龍不與一錢。隆武給空劄百函爲行資而已。道周以劄號召門下。得百人。居吉安。與楊廷麟萬元吉爲呼應。出兵徽州。被擒。械送江寧。道周絕粒不食十四日。不死。內院洪承疇疏救。言道周清節夙學。負有重望。今罪在不赦。而臣察江南人情。無不憐憫痛惜道周者。伏望皇上赦其重罪。待以不死。上不允。尋同中書賴雍蔡繼謹等。死於西市。

吏部尙書張肯堂與郎中趙玉成疏言。臣等生長海濱。請以水師千人。由海道直抵金山。襲取金陵。以迎陛下。隆武帝大喜。促芝龍造舟。芝龍笑諾。會有言水師諸臣宜留其眷屬。以防潛逸者。帝遂止。

丙戌春。以足板擲蔣德璟。幾傷。隆武帝決意親征。二月。駐建寧。楚撫何騰蛟。江右楊廷麟。皆具疏迎請。隆武帝欲往江右。意未決。而芝龍固請回閩。閩人數萬呼擁。因駐

蹕劍津。而以兵部尙書吳春枝留守。晉大學士。辭不受。留駐浦城。蔣德璟自請行關。相機督戰。隆武許之。比至。則疲兵弱卒。朽甲鈍戈。一無可爲。德璟告病去。而戶部尙書李長倩以餉不繼憂死。提學御史毛協恭亦憤卒。六月。吳炳自江右單騎入關。命以布政提調棘闈。而用編修劉以修爲主試官。取中舉子葉瓚等百餘人。一時皇子誕生。羣臣表賀。有日月爲明止戈爲武語。隆武嗟賞。大赦。覃恩。凡鄭氏廝養。俱得三代封誥。撰勅織軸者。日不暇給。時兵弱餉匱。當事無談及者。舉朝如醉如夢。不待識者而知其敗矣。

時清遣大學士洪承疇經略江南。御史黃熙胤招撫福建。皆晉江人。與芝龍同里。芝龍密遣人通款。而隆武帝日與魯監相仇。監國遣都督陳謙。行人林奎。奉使趨趙。未敢入關。芝龍以書招之。乃入。陛見。啟函。稱皇叔父而不稱陛下。隆武帝大怒。下二人獄。芝龍疏救。不聽。陳謙者。武進人。乙酉春。齎弘光詔。封芝龍爲安南伯。比啟讀。券乃誤書南安。謙謂芝龍曰。安南則兼兩廣。南安僅一邑耳。請留券而易詔。更進伯爲侯。

芝龍大喜。厚贈而別。及半途而南京變。芝龍素德謙。有鎮江錢邦芭者。本出芝龍門下。以召對稱旨。擢爲御史。爲隆武信任。密啟曰。陳謙爲魯心腹。且與鄭至交。不急除。恐有內變。或以告芝龍。芝龍謂刑所必經其門。臨期救之。未晚。至夜半。內傳片楮。別移謙斬之。芝龍聞。伏尸哭。極哀。以千金百布。葬謙。爲文以祭。有我雖不殺伯仁。伯仁由我而死之語。遂疏稱海寇狎至。今三閩餉取之臣。臣取之海。無海則無家。非過征不可。拜表卽行。中使手敕云。先生稍遲。朕與先生同行。及之河。則飛帆已過延平矣。芝龍旣去。守關將施福。聲言缺餉。盡撤兵還安平。蓋微聞錢塘信也。錢塘自正月。至三月。各營皆西望心裂。王之仁疏言。始事之日。人人有直取黃龍之志。乃一敗之後。遂欲以錢塘爲鴻溝。天下事何忍言。臣今惟有前死一策。以所隸舟師決戰。今日欲死。猶戰而死。他日卽死。恐不能戰也。

三月朔。清兵開堰。驅舟入江。國維命之仁統舟師。江心接戰。值東南風作。之仁揚帆奮擊。國維督諸軍渡江。會隆武帝命陸清源。賈詔。至江犒師。馬士英。嗾方國安。斬之。

且出榭數隆武帝過。國維曰。禍在此矣。

四月。清兵守杭州。監國議抽兵命國維西征。而以禮部尙書余煌兼兵部事。督師江上。時清貝勒王屯兵北岸。江涸可試馬。用礮擊南營。碎國安廚鍋。國安曰。天奪吾食也。因念隆武帝曾以手勅相招。往必大用。否亦可入滇黔。遂於五月二十七夜。拔營走紹興。劫監國南行。次日。江上諸師聞之。俱潰。鄭遵謙移貲入海中。二十九日。王之仁兵尙在。亦將入海。國維議抽其兵五千。分守各營。之仁泣曰。壞天下事者。方國安也。今清兵數萬。倏渡南岸。孤軍何以迎敵。之仁有舟可入海。公并無舟。何以爲計。國維乃追扈監國行。尙書余煌盡啟九門。令民出走。旣畢。整衣冠。赴水死。

六月朔。清兵過錢塘。國維行次黃石巖。方阮馬三家兵。斷所過橋。橋下刻大字兩行云。方馬至此止。國安士英定謀。出獻監國。遣人入守。值守者病。監國脫登海舟。傳諭國維。退保四邑。遂過東陽。時六月十八日也。

二十八日。清兵破義烏。有勸國維入山者。國維曰。誤天下者。文山疊山也。一死而已。

次日。清兵至七里寺。國維作絕命詩三章。詩一章自述。曰。艱難百戰戴吾君。拒敵辭唐氣厲雲。時去仍爲朱氏鬼。精靈當傍孝陵墳。詩二章念母。曰。一瞑纖塵不掛胸。惟哀耄母暮途窮。仁人錫類能無意。存歿啣恩結草同。詩三章訓子。曰。夙訓詩書暫鼓鉦。而今絕口莫談兵。蒼蒼若肯施存恤。乘耒全身答所生。具衣冠南向再拜曰。臣力竭矣。從容赴園池死。

興國公王之仁。載其妻妾并兩子婦幼女諸孫。盡沉於蛟門下。捧所封敕印。北面再拜。投之水。獨至南京。戴冠登陸。百姓駭愕聚觀。之仁從容入見內院。洪承疇自稱仁係前朝大帥。不肯身泛波濤。願來投見。死於明處。承疇優接以禮。命薙髮。不從。八月二十四日。就戮西市。

兵部侍郎陳函輝。哭入雲峯寺。作絕命詞八首。詞云。生爲大明之人。死作大明之鬼。笑指白雲深處。蕭然一無所累。子房始終爲韓。木叔生死爲魯。赤松千古成名。黃蘗寸心獨苦。父母恩無可報。妻兒面不能親。落日樵夫湖上。應憐故國孤臣。臣年五十。

有七。回頭萬事已畢。徒慙赤手擎天。惟見白虹貫日。去夏六月廿七。虛度一生世法。但嚴心內春秋。莫問人間花甲。斬盡一生情種。獨留性地靈光。古衲共參文佛。麻衣泣拜高皇。手著遺文千卷。尙存副在名山。正學焚書亦出。所南心史難刪。慧業降生文人。此去不留隻字。惟將子孝臣忠。貽與世間同志。又作自祭文。埋骨文。從容自經死。禮部侍郎王思任。不食死。太僕少卿陳潛夫。偕妻孟氏。妾孟氏。夫妻姊妹聯臂共沉河死。兵部主事葉汝菴。同妻王氏溺死。兵部主事高岱。絕食死。子朗爲諸生。亦赴水死。通政司使吳從魯。不薙髮死。原任山西僉事鄭之尹。沉水死。其諸生死者。諸暨方炯。山陰朱煒。赴水死。蕭山楊雲門。雪一作門自縊死。醫生倪舜生。一作年正襟危坐磁缸內。命人掩覆。朗聲誦佛死。

清兵至金華。大學士朱大典固守。攻月餘。不下。以紅衣礮攻之。城陷。大典縱火自焚。死。其子師鄭邠。武進人。亦死之。張鵬翼守衢州。標將秦應科等爲內應。城陷。鵬翼及樂安王。楚王。晉平王。皆被殺。督學御史王景亮。被執不屈。遇害。阮大鍼。馬士英輩。猶

擁殘兵。數請入關。隆武帝以其罪大。不許。士英遁至台州山寺爲僧。旋爲清兵搜獲。大鉞投降。貝勒令辦事內院。方逢年、方國安、及尙書蘇杜等俱投順。

時舊撫田兵、及方氏鄭氏兵、號三家兵、或離或合、透迤而南、所在劫掠、或挾婦女、坐山頭、呼盧浮白、漫衍嶺界、四五日、關門無一守兵、又數日、清騎數十、從容過嶺、然入閩者、或由建、或由汀、或由福寧、俱從山谷間、道出不意、不必由仙霞也、潰兵先過者、焚掠求食、至建寧、科臣黃大鵬、按臣鄭爲虹、發倉廩犒之、皆歡呼去、一郡獨全。

八月十七日、清兵至浦城、百姓請降、爲虹不可、及兵入、擁爲虹見貝勒、迫之跪、爲虹不屈、貝勒嘉之、勸以薙髮、爲虹曰、負國不忠、辱先不孝、忠孝俱虧、生亦何爲、寧死不從也、明日、復召見、責以輸餉、爲虹持不可、噴血大罵、貝勒下令斬之、爲虹奮躍、奪刀自刺其胸、不死、遂見殺、義僕陳龍、標下遊擊原某、千戶張萬明、及子都司張翹鸞、都督洪祖烈、俱從死、大鵬亦同日殉難、浦民立祠焉。

隆武帝自芝龍旣去、定計幸贛、八月二十一日、始行、猶載書十車以從、二十四日、至

順昌。聞清兵已及劍津。且踵至。倉皇騎奔。從者止何吾騶、郭維經、朱繼祚、黃鳴俊。數人。既而吾騶維經亦散去。清兵至順昌。搜龍槓。得士英。大鉞國安於既降後。有請駕出關爲內應。疏追之。大鉞方遊山。投崖而死。仍戮尸。士英等四人。駢斬延平城下。家眷百餘口。盡給賜兵丁。清兵過延平而東。獨陳謙之子某。帥數騎追駕。欲爲父報仇。及於贛州。時隆武帝將入廣。因停一日。曝龍鳳衣。遂爲所及。并擒曾后。及朱繼祚、黃鳴俊。械至福州。隆武帝與曾后皆遇害。繼祚勒致仕。旋爲亂兵所殺。鳴俊許授五品官。以老疾辭。免。禮部尙書曹學佺、通政使馬思理。俱自縊死。別遣固山韓某、李成棟、略興泉汀漳等處。九月八日。入泉州德化。知縣陳元青迎降。大學士蔣德璟絕食死。十五日。至汀州。十月十九日。入漳州。守道傅從龍、知府金麗澤降。皆仍舊職。不數日。鄉兵起義。被殺。

初。清兵未至泉州。鄭芝豹先至。閉城門。大索餉。皆計鄉紳家財勒取。不應。皆卽梟首。至縛親家母於庭。抵暮。得數萬。又其火手五百。將盡焚城中宮室。以餉未足。遲至明。

日。俄報固山兵將至。乃奔安平。

芝龍保安平。軍容烜赫。戰艦齊備。礮聲不絕。震天地。以前遣洪黃之信未通。猶豫未敢迎師。又自恃先撤關兵。無一矢相加。有大功。而兩廣素屬部下。若招兩廣以自效。閩廣總督可得。猶南面王也。貝勒令泉紳郭必昌。與芝龍最厚者。招之。芝龍曰。吾非不忠於清。恐以立王爲罪耳。會固山兵逼安平。芝龍怒曰。旣招吾。何相逼也。貝勒聞。乃切責固山。令離安平三十里。勿駐軍。而遣內院二人。持書至安平。書略曰。吾所以重將軍者。以將軍能立唐藩也。人臣事主。苟有可爲。必竭其力。力盡不勝天。則投明而事。乘時而建不世之功。此豪傑事也。若將軍不輔立。吾何用將軍哉。且兩粵未平。今鑄閩粵總督印以相待。吾所以欲將軍來見者。欲商地方人才故也。芝龍得書。大悅。其子弟皆勸芝龍入海。魚不可脫於淵。不願降。而芝龍田園徧閩廣。秉政以來。增置莊倉五百餘所。驚馬戀棧。遂進降表。過泉州。大張布告。誇投誠之勳。猶持貝勒書。招搖得官者。就議價。十一月十五日。至福州。朝見貝勒。握手甚歡。折箭爲誓。遂命酒。

痛飲。飲三日。夜半。忽拔營起。遂挾之而北矣。從者五百人。皆別營。不得見。亦不許通家信。芝龍對面作家書數封。皆囑無忘清朝大恩語。而謂貝勒曰。北上面君。乃龍本願。但子弟多不肖。今擁兵海上。倘有不測。奈何。貝勒曰。此與爾無與。亦非吾所慮也。芝龍既行。鄭彩、鄭鴻逵、鄭成功。皆率所部入海。張肯堂往舟山。依魯監國。芝豹獨奉母居安平。芝龍至京。陛見。奉朝請。丁亥秋。鄭彩、鄭成功。殺掠漳泉諸郡。皆破之。汀邵並亂。遂據建寧。戊子夏。清兵再入閩。破建寧。屠之。直抵泉州。鄭氏兵復遁入海。

附紀

初。福建既陷。惟曾慶據平樂。劉中藻據福寧。己丑冬。清分兵攻之。慶既降。被殺。中藻勢窮。自縊。而延漳汀三州。界連江右。延平所屬。又處萬山中。乘清兵既回。復擁立德化王慈燁。取大田。復龍溪。十一月中。清復遣靖南王耿○來攻。尙書羅南生出降。王被獲。

癸己。清兵克舟山。魯監國○張肯堂死之。

己亥夏六月。鄭氏復率舟師。大舉北伐。人心震動。師次京口。進攻江寧。軍行不戒。爲梁化鳳乘間襲殺。大敗而去。海氛遂靖。至庚戌。鄭氏有投誠之志。朝廷遣大學士吳□□、吏部侍郎蔡毓榮、學士明珠、經理其事。遂命興化知府慕天顏往復臺灣。業有成局。而三藩不欲。事遂寢。又十餘年。三桂就滅。諸藩盡芟。至癸亥甲子。鄭成功之子□□、偕故明之後□□、歸降。時天下大定。法網久寬。遂受之。而處之齊魯之間。海波由是永息矣。

隆武皇帝親答監國魯王御書

王邇來無恙。謝來使齎到書啟禮物。披閱再四。嘆王意之殷厚。媿朕躬之無似也。吾太祖夜不解甲。日不去戈。十四年而成一統洪業。封諸藩以周天下。仰窺聖意。一日千秋。或亦曰年穀歲豐。四海咸寧。天子萬年。本支百世而已。朕與姪王同分高廟。喪亂之後。存吾二人。但使稍明理道。何忍一線嫌疑。卽是自亡高廟。若求無嫌無疑。惟各善體祖意。有唐蹠血。萬世唾焉。靖難云云。痛祖斯甚。使朕處之。蓋必有道。旣見今

人笑往。斷不令後人笑。今此實朕志。王勿汎觀也。朕性至淡。遇每違心。家難垂三十年。荷吾威宗。幸不墜祀。七載奉藩。日以圭紱爲極。梏辭爵雪父。蒙難八年。昨春寇變。初夏時。鳳鎮牟文綬三請進營。願躬擁戴。朕志守節。以死自甘。今其人固在。不可欺也。聖安恩宥。溯流遇變。抵嘉興。擁勸頗衆。朕復以死自誓。出揭首奉潞王。臨安再覆。黃道周、鄭鴻逵、翼戴於前。鄭芝龍、浙閩臣奉迎於後。朕猶出揭讓賢。如姪王者。亦在此讓揭之內。其時虜勢如傾。人心如沸。瑞桂惠王近枝。旣邈不可問。但有朱家一庶宗。能發憤而纘鴻名。使我祖祀不斷。朕實甘心北面。惜不見此。乃爲文武所逼。以巢繇之身。被堯禹之服。一毫利此。則天地祖宗。誅之殛之。四方萬世。誅之殛之。蓋朕雖才非光武。而志願頗效周文。秦漢以後。帝制太濃。使篡弑接踵。傷哉此位。至苦至危。故祖制所以有親王。樂過天子之教也。閏六月七日監國。二十七日登極。誓以身殉祖廟。御詔求助萬方。猶曰始借大號。以復舊疆。終必訪道。而全高尚。然今半年。名曰天子。依然長素布袍。宛一疇昔故我。所增者。三鼓批覽不休。黎明寒暑先起。見一好

臣如得性命。聞一警信。似痞埋胸。焦兵勞民。憂文悼武。多少傾不盡苦。朕年近知命。未耀前星。疲面癯形。或亦殉祖之實狀也。王以七月十七日監國於台。八月十六日。迎至於紹。朕方喜有分勞。而慮開歧視。日盼王之善音。如冀衣食寒暖。陳曜之回詞。愈於理。音得而未善也。今柯曹二臣至。音善而猶未盡也。蓋膝下之稱。以父待子。是王之過厚。而猶曰啟曰書。則似婉示朕不足。纘鴻名而雪高廟也。朕實虛心自慙。焦勞六月。各路之師未至。江上寸土未復。親征遲緩。累吾姪王枕戈臨戎。忍痛。然亦非無自也。姪王雖值虜衝。然所當西興一帶數百里。稍易爲力。朕自頒詔四方。雲貴兩廣。楚豫江川。奏賀畢至。虜寇交訌。錢糧一分未至。而數千里安危。仰成於朕。致朕左支右吾。拮据六月。幸賴祖靈。闖逆授首於楚省。靖江底定於粵東。江右境土漸復。三吳臣民踵至。痛念口戰六月。杭虜猶抗。徽逆尙梗。師未奏功。是用今臘六日。朕已親自臨戎。直趨江干督戰。先衢暫住。俟王回音。或諸臣不信朕之坦懷。各恐失其佐命。王或不答。或再復以責備。朕一定怡然自咎。惟期奮力江干。贖朕無能之過。或又不

爾則實不敢舍溫衢。自絕八閩咽喉。躬率兵將於建撫。爲上游瞻仰孝陵之計。王勉事武林。期與姪王共至金陵。以情不忍。將秦比祖。以地不得不借成說。聊以自明。蓋如所謂先入關者王。當關舊京。不當關一杭。咸陽之定。原有成法。是諸臣之小誤。當政。勿令義帝笑人。萬一姪王排紛紛之羣議。不以列國自待。而負一統高皇。朕之處王。止有一讓。王之處朕。豈恁恻然。監國旣奉欽命。何難一表明尊。此實高廟之靈。非朕福德所至。然存亡關頭。實在於此。朕有言曰。今而後斷與王以玉帛見。斷不與王以弓矢見。王未帝則無不盡其挽。王稱尊則無不盡其讓。朕志決矣。願王首善爲高廟計。次善爲朕與王計也。總之雖變遇萬籌。朕第有朴誠自待。信筆無文。惟貴達意。王雖自有其歷。朕歷亦不忍遍頒四方。而獨遣王姪不贈也。朕心切盡。置用惟王。十一月二十日。冊封親郡十王。令徽遠再續。功繼崇陽。以上答我高廟。王或不厭所聞。故於書尾併及。冬寒珍重。惟監國姪王亮之。

隆武遺事終